



Олий ва ўрта махсус таълим вазирининг 2019 йил
даги 1019 -сон буйруғига
1-ИЛОВА

Олий ва ўрта махсус, профессионал таълим муассасасининг Талаба (ўқувчи)лар турар жойи тўғрисида намунавий НИЗОМ

1-боб. Умумий қоидалар

1. Мазкур Низом олий ва ўрта махсус, профессионал таълим муассасаси Талаба (ўқувчи)лар турар жойи (кейинги ўринларда турар жойи деб юритилади)да яшашнинг умумий қоидалари, олий ва ўрта махсус, профессионал таълим муассасасининг профессор-ўқитувчилари, талабалари (ўқувчилари)нинг ҳуқуқ ва мажбуриятлари ҳамда унинг фаолиятини ташкил этиш тартибини белгилайди.

2. Турар жойида талабаларнинг яшаши, ўз устида мустақил ишлаши, дам олиши ҳамда спорт, санъат ва бошқа клубларда қатнашиши учун шароитлар яратилади.

3. Турар жойи ўз фаолиятини Ўзбекистон Республикасининг Конституцияси ва Қонунларига, Ўзбекистон Республикаси Олий Мажлиси палаталари ва қарорларига, Ўзбекистон Республикаси Президентининг фармон, қарор ва фармойишларига, Ўзбекистон Республикаси Вазирлар Маҳкамасининг қарор ва фармойишларига, Ўзбекистон Республикаси Олий ва ўрта махсус таълим вазирлигининг ҳайъат қарорлари буйруқлари, олий ва ўрта махсус, профессионал таълим муассасаси Устави, Кенгаши қарорлари, олий ва ўрта махсус, профессионал таълим муассасаси ректори (директори)нинг буйруқлари ҳамда мазкур низомга мувофиқ олиб боради.

4. Турар жойида яшовчилар Ўзбекистон Республикаси Ички ишлар вазирлиги томонидан белгиланган қоидалар асосида вақтинча рўйхатга олинадилар. Рўйхатга олиш ишларини ташкил этиш турар жойи раҳбари томонидан таъминланади.

5. Турар жойига олий ва ўрта махсус, профессионал таълим муассасаси ходимлари ва талабалар (ўқувчи)нинг оила аъзолари ҳамда бегона шахсларни яшаш учун рухсат бериш қатъиян ман этилади.

6. Турар жойида яшаганлик учун тўлов белгилаш ва унинг миқдори олий таълим муассасаси ҳамда 11-синф базасида тўлов-шартнома асосида ўқувчилар қабул қиладиган профессионал таълим муассасаларида педагогик Кенгаш қарори билан белгиланади. Тўлиқ давлат таъминотида бўлган касб-хунар мактаблари ва академик лицейларда турар жойи учун тўлов амалга оширилмайди.

2-боб. Турар жойида яшовчиларнинг ҳуқуқ ва мажбуриятлари

7. Турар жойида яшовчиларнинг ҳуқуқлари:

турар жойи биноларидаги маданий-маиший жиҳозлардан фойдаланиш;

фойдаланиш учун яроқсиз ҳолга келган жиҳоз, мебел ва бошқа мулкларни таъмирлаш, янгилаш ҳамда маиший хизматлардан фойдаланишда юзага келган камчиликларни бартараф этишни сўраб турар жойи раҳбариятга мурожаат қилиш;
турар жойида ўтказиладиган оммавий, маданий, спорт ва тарбиявий

тадбирларда иштирок этиш;

яратилган шарт-шароитлар бўйича олий ва ўрта махсус, профессионал таълим муассасаси раҳбариятига таклифлар билан чиқиш;

Талаба (ўқувчи)лар кенгаши аъзоларини сайлаш ва унга сайланиш;

Талаба (ўқувчи)лар кенгаши орқали турар жойининг маиший таъминотини такомиллаштириш, тарбиявий ишлар ва маданий ҳордиқни ташкил этиш, яшаш хоналарини жиҳозлаш бўйича масалаларни муҳокама этишда иштирок этиш.

8. Турар жойида яшовчиларнинг мажбуриятлари:

мазкур низом ва турар жойи ички тартиб қоидалари, шунингдек олий ва ўрта махсус, профессионал таълим муассасаси билан тузилган шартнома қоидаларига риоя қилиш;

навбатчилик жадвалига биноан яшаш хоналарида, қаватларда, умумий фойдаланиш жойлари (ҳожатхона, ювиниш хонаси, ошхона ва бошқа жойлар) да навбатчилик қилиш;

умумий фойдаланиш жойлари, яшаш хоналари ҳамда дам олиш жойларида намунали тозаликни ташкил этиш, ундаги жиҳозлардан тўғри ва унумли фойдаланиш;

газ, электр жиҳозларидан ҳамда иситиш тизимидан фойдаланиш қоидаларига қатъий риоя қилиш ва улардан оқилона фойдаланиш;

турар жойидан узоқ муддатга кетаётиб (ёзги ва қишки таътил, дам олиш, амалиёт, академик таътил олган ҳоллар), турар жойи раҳбарини икки кун олдин ёзма равишда огоҳлантириб қўйиш;

кундалик эҳтиёжга эга бўлмаган катта ҳажмдаги шахсий ва қимматбаҳо буюмларни турар жойининг буюмлар сақлаш хонасига топшириш;

яшаб турган хонаси ва бошқа умумий фойдаланиш жойларини ҳар доим тоза ва тартибли тутиш;

турар жойида яшовчилар билан доимо самимий, аҳил муносабатда бўлиш;

турар жойидаги мавжуд барча жиҳозларни намунали даражада тутиш;

умумий фойдаланиш жойларига ўрнатилган ёритгичлар, электр ва газ плиталарини бузмаслик, ювиниш хонаси, ошхона ҳамда маънавият ва маърифат хоналаридан тўғри фойдаланиш;

турар жойида ўтказиладиган ҳашарларда, атрофни кўкаламзорлаштириш ва ободонлаштириш ишларида мунтазам равишда қатнашиш;

турар жойи мол-мулкидан тўғри ва унумли фойдаланиш ва зарар етказмаслик;

ўқишни тугатган ёки талабалар сафидан четлаштирилган, академик таътил олган ҳолларда икки кун муддатда, шунингдек турар жойидан узоқ муддатга кетишдан олдин (ёзги ва қишки таътил, дам олиш, амалиёт) жиҳозларни ва хона калитини турар жойи раҳбарига қайтариб топшириш.

9. Турар жойида яшовчиларга қуйидагилар ман этилади:

турар жойи раҳбарининг рухсатсиз бир хонадан иккинчи хонага кўчиб ўтиш;

яшаш хонасида кир ювиш;

хонадаги анжомларни бошқа хонага рухсатсиз кўчириш;

хонадаги электр тармоқларини ўз хоҳишича ўзгартириш ва қўшимча ёритгич ўрнатиш, деворларга расмлар чизиш ва ёпиштириш;

овоз кучайтирувчи курилмалардан фойдаланиш, юқори овозда ашула айтиш ва мусиқа асбобларини чалиш (*мусиқа ва санъатга ихтисослашган йўналиш, гуруҳ, факультет талаба (ўқувчи)лари яшовчи турар жойлари бундан мустасно*);

электр иситгичлар ва керосиндан фойдаланиб ишлайдиган асбобларни ишлатиш;

яшаш хонасида бегона шахсларнинг тунаб қолишлари учун жой бериш;

спиртли ичимликлар, гиёҳванд моддаларни истеъмол қилиш, сақлаш, сотиш ҳамда карта ва қимор ўйинларини ўйнаш ва ҳ.к.;

турар жойи хоналарида диний маросимларга оид тадбирлар, йиғинлар ўтказилиши, диний сабоқ берилиши ва ўрганилиши.

10. Турар жойи фаолиятида иштирок этишда фаоллик кўрсатган намунавий хулқли талаба (ўқувчи) қуйидаги тартибда рағбатлантирилади:

миннатдорчилик билдириш;

мақтов ёрлиғи топшириш;

эсдалик совғалари билан тақдирлаш;

моддий рағбатлантириш.

11. Турар жойи ички тартиб қоидалари, олий ва ўрта махсус, профессионал таълим муассасаси одоб-ахлоқ қоидаларини бузган талаба (ўқувчи)га нисбатан қуйидаги чоралар кўрилади:

- Ҳайфсан;

- Турар жойидан чиқариш.

12. Олий ва ўрта махсус, профессионал таълим муассасасидан четлатилган талаба (ўқувчи) шу хусусида буйруқ чиққандан сўнг ёки бошқа сабаблар бўйича турар жойидан чиқиши белгиланган талаба (ўқувчи) бир ҳафта муддат ичида турар жойидан чиқарилади.

13. Талаба (ўқувчи) турар жойида фойдаланиб келаётган мол-мулкка бевосита етказилган ҳақиқий зарарни тўлаши шарт.

3-боб. Турар жойининг вазифалари ва функциялари

14. Турар жойининг асосий вазифалари қуйидагилардан иборат:

талабалар (ўқувчилар)нинг таълим ва тарбия олишлари учун турар жойида муносиб шарт-шароитлар яратиш;

турар жойига яшаш учун тавсия этилган талабалар (ўқувчилар)ни жойлаштириш, уларнинг контингенти билан самарали иш олиб бориш;

турар жойида талабалар (ўқувчилар)нинг ўзини ўзи бошқарувини ташкил этиш ҳамда ўрнатилган ички тартиб қоидаларига риоя этилишини таъминлаш.

15. Турар жойи ўзига юклатилган вазифаларни бажариш мақсадида қуйидаги функцияларни амалга оширади:

а) талабалар (ўқувчилар)нинг таълим ва тарбия олишлари учун турар жойида муносиб шарт-шароитлар яратишда:

турар жойи иш режасини бугунги кун талаблари ҳамда талабалар (ўқувчилар)нинг хоҳиш-истаклари, жамиятимиздаги ислохотларни инобатга олган ҳолда тайёрлаш ва тасдиқлаш учун киритиш;

турар жойида талабалар (ўқувчилар)нинг яшаши, ўз устида мустақил ишлаши, дам олиши ҳамда спорт, санъат ва бошқа тўғаракларда қатнашиши учун шароитлар яратиш;

турар жойида олий ва ўрта махсус, профессионал таълим муассасаси томонидан моддий-техника таъминоти, уни капитал ва жорий таъмирлаш, бинодаги қаттиқ ва юмшоқ мебель, хона жиҳозлари (кўрпа-тўшак, ёпинчиқлар ва бошқалар), техника воситаларини сақлаш, таъмирлаш, худудни ободонлаштириш, тозалигини таъминлаш, коммунал-хўжалик хизматлари (иссиқ ва совуқ сув таъминоти, канализация, иссиқ сув қувурларини таъмирлаш) ва бошқа шарт-шароитлар яратиш;

ўқув ва дарс тайёрлаш хонаси, дам олиш хонаси, тиббиёт хонаси, ювиниш хонаси, буюмларни сақлаш хонаси, ошхона, спорт ва кино заллари ва ота-оналар хоналарини мунтазам фойдаланишга яроқли ҳолда сақлаш;

талабалар (ўқувчилар)ни бўш вақтларини мазмунли ташкиллаштириш учун олий ва ўрта махсус, профессионал таълим муассасаси ва турли ташкилотлар томонидан режа асосида ва режадан ташқари маънавий-маърифий тадбирлар ташкиллаштириш;

б) Турар жойига яшаш учун тавсия этилган талабалар (ўқувчилар)ни жойлаштириш, уларнинг контингенти билан самарали иш олиб боришда:

турар жойида яшашга тавсия этилган талабалар билан “Талабалар (ўқувчилар) турар жойидан хона ва жиҳозлар бериш тўғрисида” шартнома ва “Талабалар (ўқувчилар) турар жойидан хона ва жиҳозларни топшириш-қабул қилиш” далолатномалари тузиш ва тиббий кўрикдан ўтказиш билан боғлиқ ишларни ташкиллаштириш;

талабалар (ўқувчилар)ни яшаш хоналарига жойлаштириш;

санитария-гигиена нормаларининг бажарилишини таъминлаш;

ҳар бир яшаш хонаси учун хона сигимидан келиб чиқиб, яшаш учун зарур анжомлар билан таъминлаш;

турар жойида яшайдиган талабалар (ўқувчилар)нинг шахсий варағи, улар ҳақидаги умумий маълумотлар ва статистик жадвалларни юритиш;

в) турар жойида талабалар (ўқувчилар)нинг ўзини ўзи бошқарувини ташкил этиш ҳамда ўрнатилган ички тартиб қоидаларига риоя этилишини таъминлаш;

турар жойида талабалар (ўқувчилар)нинг ўзини ўзи бошқарувини шакллантириш ва амалга ошириш мақсадида – Талабалар (ўқувчилар) кенгаши (кейинги ўринларда Кенгаш деб юритилади) ташкил этиш;

турар жойида ўрнатилган ички тартиб қоидаларига риоя этилишини таъминлаш.

4-боб. Турар жойи фаолиятини ташкил этиш

16. Турар жойи ўрнатилган талаблар асосида фаолият юритиши учун олий ва ўрта махсус, профессионал таълим муассасаси ректори (директори) шахсан масъулдир.

17. Турар жойида бешта ташаббус хоналари, дам олиш хоналари, тиббиёт хонаси, ошхона, ҳожатхона, ювиниш хонаси, ўқув зали, кутубхона, спорт зали, буюмларни сақлаш хонаси ва бошқа хоналар ташкил этилади.

18. Турар жойи ошхона газ плиталари, стол-стул, сув тармоғи, санитария жиҳозлари билан таъминланиши ҳамда ёнғин хавфсизлиги ва санитария талабларига жавоб бериши шарт.

19. Турар жойини олий ва ўрта махсус, профессионал таълим муассасаси

ректори (директори) томонидан лавозимга тайинланадиган ва лавозимидан озод қилинадиган талабалар (ўқувчилар) турар жойи мудир бошқаради. Мудир турар жойидан фойдаланиш, ички тартиб қоидаларга риоя қилинишини таъминлаш, талабаларга қулай шароитларни яратишни ташкил этиш учун масъул ҳисобланади.

Турар жойи штатлар бирлигини таъминлаш, уларни ўз хизмат вазифаларини бажаришларини назорат қилиш, талабалар (ўқувчилар) учун зарур шарт-шароитларни яратиш бериш ва ижтимоий ҳимоя қилиш ҳамда талабалар (ўқувчилар) ўртасида ташкилий, хўжалик, ҳуқуқий-тарбиявий ишларни олиб бориш турар жойи раҳбари томонидан амалга оширилади.

20. Турар жойида раҳбар бошқарувида штатлар жадвалига мувофиқ белгиланадиган ходимлар фаолият юритади.

Таълим муассасасида 1000 нафардан ортиқ талаба истиқомат қиладиган уч ёки ундан зиёд бир-бирига яқин турувчи талабалар турар жойлари бинолари мавжуд бўлганда, талабалар турар жойлари талабалар шаҳарчасига бирлаштирилиши мумкин. Талабалар шаҳарчаси ташкил этилганда 1 бирлик ҳисобида талабалар шаҳарчаси директори лавозими киритилади.

21. Турар жойида олиб борилаётган ишларни мувофиқлаштириш ва назорат қилиш масъулияти олий ва ўрта махсус, профессионал таълим муассасаси ёшлар билан ишлаш бўйича проректори (маънавий-маърифий ишлар бўйича директор ўринбосари) зиммасига юкланади.

22. Олий таълим муассасалари турар жойида маънавий-ахлоқий тарбия самарадорлиги учун шахсан педагог-тарбиячи (тарбиячи) масъул ҳисобланади. Педагог-тарбиячи (тарбиячи)нинг иш режаси олий ва ўрта махсус, профессионал таълим муассасаси ёшлар билан ишлаш бўйича проректори (маънавий-маърифий ишлар бўйича директор ўринбосари) томонидан тасдиқланади ҳамда унинг фаолиятини мувофиқлаштиради.

23. Турар жойида яшашга тавсия этилган талабалар (ўқувчилар) билан “Талабалар (ўқувчилар) турар жойидан хона ва жиҳозлар бериш тўғрисида” шартнома ва “Талабалар (ўқувчилар) турар жойидан хона ва жиҳозларни топшириш-қабул қилиш” далолатномалари тузилади ва талабалар (ўқувчилар)ни тиббий кўрикдан ўтказиш билан боғлиқ ишлар ташкиллаштирилади.

24. Турар жойида яшаш учун талабалар томонидан тўланадиган тўлов миқдори ҳар ўқув йили бошида олий таълим муассасаси Кенгашининг тегишли қарори билан белгиланади. Турар жойида яшаганлик учун тўловларни амалга ошириш муддатлари шартномада белгиланади.

Талаба-ўқувчиларнинг ёзги таътил даври учун тўлов амалга оширилмайди.

25. Турар жойида яшаганлик учун белгиланган тўловларни амалга оширишда олий таълим муассасасининг қуйидаги тоифадаги талабаларига имтиёзлар олий таълим муассасаси Кенгаши томонидан берилиши мумкин:

кўз касалликлари бўйича 1-2-гуруҳ ногиронлари, чин етим ва етим (оталаридан бири вафот этган), Меҳрибонлик уйи тарбияланувчилари ва кам таъминланган талабалар (ўқувчилар)ни тўловдан озод этиш;

умумий касалликлар бўйича 2-гуруҳ ногиронлари, ўз вазифасини намунали бажариб келаётган Кенгаш раиси, қават сардорлари ҳамда турар жойи кутубхонаси учун масъул талабалар учун умумий тўловдан 50 фоиз чегириш.

26. Талаба ва ўқувчиларни турар жойларига жойлаштиришда мавжуд ўринлардан эҳтиёж ва талаб юқори бўлган ҳолатларда куйидаги мезонлар кетма-кетлиги асосида ўқувчи ва талабалар устунликка эга бўлади:

- Чин етим талаба-ўқувчилар (курсидан қатъий назар);
- “Меҳрибонлик уйлари” тарбияланувчилари;
- Ногиронлиги мавжуд талаба-ўқувчилар (курсидан қатъий назар);
- Ижтимоий ҳимояга муҳтож, моддий аҳволи оғир талабалар (шунингдек, битта оилада 2 ёки ундан ортиқ шахс тўлов-шартнома асосида ўқиётган бўлса);
- Хориждан келиб таҳсил олаётган талабалар;
- 1-2 курс талабалари;
- Талаба (ўқувчи) қизлар;
- Ёшлар иттифоқининг фаоллари;
- Халқаро миқёсдаги фан олимпиадаларида ғолибликни қўлга киритган талабалар.

- Ёзги таътил даврида “Фидокор” ёшлар меҳнат отряди таркибида талабалар турар жойларини таъмирлашда иштирок этган талабалар;

- Талабалар турар жойида доимий равишда талабалар кенгаши раиси, қават сардорлари ва бошқа жиҳатлари билан доимий равишда фаоллик кўрсатиб келаётган талабалар;

27. Турар жойининг йиллик иш режаси олий ва ўрта махсус, профессионал таълим муассасаси ректори (директори) томонидан тасдиқланади ва ҳар ярим йилда ўз фаолияти буйича олий ва ўрта махсус, профессионал таълим муассасаси ректори (директори) Кенгашига ҳисобот беради.

Турар жойининг йиллик иш режаси олиб бориладиган маънавий-маърифий ва тарбиявий ишларни ҳам қамраб олади. Иш режа олий ва ўрта махсус, профессионал таълим муассасасининг бошқа таркибий бўлинмалари ва жамоат ташкилотлари билан ҳамкорликда амалга оширилади.

28. Турар жойида амалга ошириладиган маънавий-маърифий ишлар режа асосида турли ташкилотларни жалб қилган ҳолда олиб борилиши мумкин.

29. Турар жойида олиб бориладиган маънавий-маърифий ва тарбиявий ишлар олий ва ўрта махсус, профессионал таълим муассасаси ёшлар билан ишлаш бўйича проректори (директор ўринбосари) томонидан мувоқилаштирилади.

5-боб. Турар жойида талабалар (ўқувчилар)нинг ўзини ўзи бошқарувини ташкил этиш

30. Турар жойида талабалар (ўқувчилар)нинг ўзини ўзи бошқарувини шакллантириш ва амалга ошириш мақсадида Кенгаш ташкил этилади.

31. Кенгаш ўз фаолиятини Ўзбекистон ёшлар иттифоқи олий ва ўрта махсус, профессионал таълим муассасаси бошланғич ташкилоти тўғрисида ва Талабалар кенгаши тўғрисида низомлар асосида ташкил этади ва олиб боради.

32. Кенгаш раиси фаолият олиб борган даврда турар жойи раҳбарининг ёшлар бўйича маслаҳатчиси ҳисобланади.

33. Кенгашнинг иш режаси ва дастури Кенгаш раиси томонидан ишлаб чиқилиб, бошқарув аъзолари, педагог-тарбиячи билан муҳокама қилинади ҳамда олий ва ўрта махсус, профессионал таълим муассасаси ёшлар билан ишлаш бўйича проректори (директор ўринбосари) томонидан тасдиқланади.

34. Яшовчиларга рағбатлантириш ёки интизомий чоралар кўриш масаласи Кенгаш билан келишилган ҳолда ҳал этилади.

6-боб. Турар жойи фаолиятини назорат қилиш

35. Турар жойи фаолияти олий ва ўрта махсус, профессионал таълим муассасаси раҳбарияти ва жамоат ташкилотлари томонидан махсус режа асосида ўрганиб борилади ҳамда унинг натижалари олий ва ўрта махсус, профессионал таълим муассасаси Кенгаши йиғилишларида муҳокама этилади.

36. Олий ва ўрта махсус, профессионал таълим муассасасининг тегишли проректорлари (директор ўринбослари) томонидан доимий назорат этиб борилади ва ўз йўналиши бўйича вазифаларни амалга ошириш юзасидан ректорга таклифлар киритади.

37. Турар жойида билдирилган мулоҳаза ва фикрларини ёзиш учун қайднома дафтари (муҳрланган) бўлиши лозим.

38. Ижтимоий тармоқларда талабалар фикрларини қабул қилиш ташкил этилади ва яшовчилар томонидан билдирилган фикр-мулоҳазалар ҳар ҳафтада бир марта турар жойида тегишли факультет раҳбарияти ва турар жойи раҳбари ва Кенгаш ҳамкорлигида ўрганилиб, муҳокама қилинади ҳамда тегишли чоратadbирлар амалга оширилади.

7-боб. Якуний қоидалар

38. Турар жойини қайта ташкил этиш ва тугатиш қонун ҳужжатларида белгиланган тартибда амалга оширилади.



Олий ва ўрта махсус таълим вазирининг 2019 йил
даги 1019 -сон буйруғига
2-ИЛОВА

**Олий ва ўрта махсус, профессионал таълим муассасалари
Талабалар (ўқувчилар) турар жойи намунавий
ИЧКИ ТАРТИБ ҚОИДАЛАРИ**

1-боб. Умумий қоидалар

1. Мазкур Қоидалар Талабалар (ўқувчилар) турар жойи (кейинги ўринларда турар жойи деб юритилади)да ўзаро мулоқот маданиятини ҳамда соғлом маънавий ва ижтимоий-психологик муҳитни шакллантириш ҳамда ривожлантириш, шунингдек, турар жойида яшашни, жиҳозлардан, умумий фойдаланиш жойларидан фойдаланишни, турар жойида яшовчи ва ходимларнинг ҳуқуқ ва мажбуриятларини, турар жойига кириш-чиқишни тартибга солиш мақсадида, олий ва ўрта махсус, профессионал таълим муассасаси барча ходим ва талабалари томонидан турар жойи ҳудудида риоя этишлари шарт бўлган ички тартиб қоидаларини белгилайди.

2. Мазкур Қоидаларда қуйидаги асосий тушунчалардан фойдаланилади:

ходим – белгиланган ёшга етган ҳамда олий ва ўрта махсус, профессионал таълим муассасаси билан меҳнат шартномаси тузган фуқаро;

навбатчи – навбатчилик жадвалига мувофиқ навбатчилик ўтовчи педагог ва бошқа ходим;

талаба – олий ва ўрта махсус, профессионал таълим муассасасига талабаликка қабул қилинган фуқаро;

яшовчи – турар жойида яшаётган олий ва ўрта махсус, профессионал таълим муассасаси талабаси (ўқувчиси);

Талабалар (ўқувчилар) турар жойига талабаларни (ўқувчиларни) жойлаштириш бўйича комиссия – талабаларни (ўқувчиларни) ижтимоий ҳимоя қилиш, уларнинг хавфсизлиги ва осойишталигини таъминлаш, яшаш шароитидан доимий хабардор бўлиб туриш ҳамда турар жойига жойлаштиришда ижтимоий адолат, тенглик, инсонпарварлик ва ошкораликни таъминлаш мақсадида ҳар ўқув йили бошида олий ва ўрта махсус, профессионал таълим муассасаси ректори (директори) буйруғи билан тузилган комиссия.

2-боб. Турар жойидан жой ва жиҳозларни олиш ва қайтариш тартиби

3. Турар жойига талабаларни (ўқувчиларни) жойлаштириш ҳар ўқув йили бошида Талабалар (ўқувчилар) турар жойига талабаларни (ўқувчиларни) жойлаштириш бўйича комиссия (кейинги ўринларда комиссия деб юритилади) қарорига мувофиқ амалга оширилади. Комиссия қарори баён билан расмийлаштирилади.

Комиссияга лавозими бўйича олий ва ўрта махсус, профессионал таълим муассасаси ёшлар билан ишлаш бўйича проректори (директор ўринбосари) раислик қилади.

Турар жойида яшашга рухсат олиш учун талабалар (ўқувчилар) ариза билан комиссияга мурожаат этади.

Комиссия ўз фаолиятини бир ўқув йили давомида амалга оширади. Комиссия талабаларни турар жойида яшаши учун рухсат бериш (рад этиш) масаласини кўриб чиқади. Комиссия ўз фаолиятида ижтимоий адолат тамойилларидан келиб чиқиб, энг биринчи навбатда чин етим, етим, боқувчисини йўқотган (ота-онаси вафот этганлиги тўғрисида гувоҳнома тақдим этилганда), II ёки III-гуруҳ ногирони (ногиронлик тўғрисида ҳужжат тақдим этилганда), кам таъминланган оилалардан бўлган ҳамда хорижий талабаларни биринчи навбатда турар жойига рухсат беришга эътибор беради.

Комиссия қарорига кўра, турар жойида яшашга рухсат берилган талабалар (ўқувчилар) томонидан жой ва жиҳозлар олиши, умумий фойдаланиш жойларидан фойдаланиши учун олий ва ўрта махсус, профессионал таълим муассасаси билан ўзаро шартнома тузилади.

Турар жойида яшашга рухсат бериш тўғрисидаги комиссия қарори талаба (ўқувчи) ўқишини тугатгунга қадар амал қилади. Агар яшовчи турар жойи ички тартиб қоидалари ёхуд бошқа талабларни бузса, шартномада белгиланган муддатларда тўловларни амалга оширмаса, у билан тузилган шартнома бекор қилинади ва яшовчи турар жойидан чиқариб юборилади.

4. Талаба (ўқувчи) билан шартнома тузилгач, олий ва ўрта махсус, профессионал таълим муассасаси раҳбари жой ва жиҳозларни тақдим қилади ҳамда ушбу Қоидалар билан таништиради.

5. Турар жойида яшашга рухсат берилганидан сўнг яшовчининг турар жойидаги яшаши, жамоат ишларида фаоллиги ва ҳ.к. ҳолатлар доимий мониторинг қилинади.

Ўқув йили охирида олиб борилган мониторинг натижаси муҳокама қилинади ҳамда олий ва ўрта махсус, профессионал таълим муассасаси ва турар жойи раҳбарияти томонидан яшовчи билан тузилган шартномаларни узайтириш ёки узайтирмаслик масаласини кўриб чиқади ва яшовчига эълон қилади.

6. Турар жойидан жой ва жиҳозлар олишда қонунда белгиланган ижтимоий ҳимояга муҳтож шахслар, шу жумладан чин етим, етим, меҳрибонлик уйи тарбияланувчиси, ногирон, боқувчисини йўқотган, кам таъминланган талабалар устунлик ҳуқуқига эга бўлади.

7. Турар жойида яшаш учун олинадиган ҳақ миқдори олий ва ўрта махсус, профессионал таълим муассасаси Кенгаши томонидан белгиланади.

8. Яшовчилар зарурат туғилса, яшаш даврида турар жойи раҳбарининг рухсати билан турар жойининг бир хонасидан иккинчи хонасига ёки турар жойидаги бир бинодан иккинчи бинога кўчиб ўтиши мумкин.

9. Шартнома муддати тугаганидан сўнг яшовчи турар жойи раҳбарига хона ва жиҳозларни бут, тоза ва озода ҳолда қайтаради. Яшовчи, шунингдек ўқишни тугатгач ёки талабалар (ўқувчилар) сафидан четлаштирилган, академик таътил олган ҳолларда икки кун муддатда, шунингдек турар жойидан узоқ муддатга кетишдан олдин (ёзги ва қишки таътил, дам олиш, амалиёт) жиҳозларни ва хона калитини турар жойи раҳбарига қайтариб топшириши шарт.

10. Яшовчилар шахсий мулкдан фойдаланиши махсус қайд этиш тўғрисидаги ҳужжат орқали амалга оширилади ва уларнинг сақланишини таъминлаш фойдаланишга олган шахс зиммасига юклатилади.

3-боб. Турар жойи яшаш хоналари, умумий фойдаланиш жойларидаги тартиб

11. Турар жойи яшаш хоналари, умумий фойдаланиш жойлари (ҳожатхона, ювиниш хонаси, ошхона ва бошқа жойлар) да санитария-гигиена талаблари таъминланиши шарт.

12. Турар жойида яшовчилар яшаш хонаси, жиҳозлар, умумий фойдаланиш жойлари бутлиги, тоза ва озодалигини сақлашлари лозим.

13. Турар жойи биноси атрофи, хоналар, умумий фойдаланиш жойларида жамоат тартибини сақлаш, тозаликни таъминлаш мақсадида талабалар орасидан навбатчилик ташкил қилинади.

4-боб. Турар жойига кириш-чиқиш тартиби

14. Турар жойига талаба (ўқувчи)нинг кириши ва чиқиши талабалик (ўқувчи) гувоҳномаси асосида амалга оширилади.

15. Турар жойида яшовчиларга ёзги вақтда кеч соат 22.00 ва қишки вақтда кеч соат 21.00 гача турар жойига киришига рухсат берилади. Дарсдан бўш вақтларда турли ташкилотларда ишлайдиган, турли тадбирларда иштирок этадиган яшовчиларнинг рўйхати турар жойи раҳбари томонидан тузилади ва тасдиқлаб қўйилади. Ушбу шахсларга истисно тариқасида турар жойига туну-кун кириб чиқишга рухсат берилиши мумкин.

16. Турар жойига келган меҳмонлар, ота-оналар, қариндошлар, дўстлар ва бошқа талабалар (ўқувчилар)нинг кириш-чиқишига фақат турар жойи раҳбари ёки навбатчи рухсат бериши мумкин.

17. Турар жойига бошқа жойдан келганлар ҳақидаги маълумотлар (келиш ва кетиш вақти, паспорт (шахсини тасдиқловчи ҳужжат) маълумотлари, хона рақами кўрсатилган ҳолда) тегишли журналга ёзиб қўйилади ва уларнинг турар жойидан соат 20.00 гача чиқиб кетиши қатъий назорат остида бўлиши шарт. Уларнинг ўз вақтида турар жойидан чиқиб кетишини таъминлаш таклиф қилган шахс зиммасига юклатилади.

18. Олий ва ўрта махсус, профессионал таълим муассасаси талабаси (ўқувчиси), шунингдек, турар жойида яшамайдиган бегона шахслар томонидан турар жойи хонасидан фойдаланишга рухсат бериш ёки имконият яратиш мазкур Қоидаларни қўпол равишда бузиш саналади ва бундай шахсга нисбатан тегишли интизомий жавобгарлик чораси қўлланилади.

19. Турар жойи қоровули, ходимлар ва яшовчилар турар жойи атроф ҳудудларида шубҳали кишилар ва буюмларни кўриб ёки сезиб қолганларида, зудлик билан ички ишлар органлари ёки тегишли ташкилотлар ҳамда олий ва ўрта махсус, профессионал таълим муассасаси раҳбариятига хабар беришлари лозим.

20. Турар жойи қоровули ташқи ва ички телефон тармоғи билан таъминланиши шарт. Унинг столида тез ёрдам, ички ишлар органлари, ёнғин хавфсизлиги, электр, газ тармоқлари, ҳокимият, Олий ва ўрта махсус таълим вазирлиги, ректор (директор), проректорлар (директор ўринбосарлари), факультет деканлари, турар жойи раҳбарининг иш, уй ва мобиль телефон рақамлари бўлиши шарт.

21. Турар жойидан буюмлар, жиҳозларни олиб чиқиб кетилишига фақат тегишли тартибда расмийлаштирилган бухгалтерия хужжати асосида рухсат берилади (тегишли тартибда қайд қилинган шахсий буюмлар бундан мустасно).

5-боб. Турар жойида яшовчиларнинг ҳуқуқ ва мажбуриятлари

22. Турар жойида яшовчилар қуйидаги ҳуқуқлардан фойдаланадилар:

ўзига ажратилган хонада ўрнатилган ички тартиб-қоидаларига риоя қилган ҳолда яшаш;

турар жойи биноларидаги маданий-маиший жиҳозлардан фойдаланиш;

фойдаланишга яроқсиз ҳолга келган жиҳоз, мебел ва бошқа буюмларни созлашни, янгилашни ҳамда маиший хизматлардан фойдаланишда юзага келган камчиликларни бартараф этишни сўраб мурожаат қилиш;

турар жойида ўтказиладиган оммавий-маданий, спорт ва тарбиявий тадбирларда иштирок этиш;

яратилган шарт-шароитлар бўйича олий ва ўрта махсус, профессионал таълим муассасаси раҳбариятига таклифлар билан чиқиш;

Талабалар кенгашининг аъзоларини сайлаш ҳамда унга сайланиш;

Талабалар кенгаши орқали турар жойининг маиший таъминотини такомиллаштириш, тарбиявий ишларни ва маданий ҳордиқни ташкил этиш, яшаш хоналарини жиҳозлаш бўйича масалаларни ҳал этишда иштирок этиш.

23. Турар жойида яшовчилар қуйидаги мажбуриятларни ўз зиммасига олади:

мазкур қоидаларга қатъий амал қилиш;

навбатчилик жадвалига биноан яшаш хоналарида, қаватларда, умумий фойдаланиш жойлари (ҳожатхона, ювиниш хонаси, ошхона ва бошқа жойлар) да навбатчилик қилиш;

умумий фойдаланиш жойлари, яшаш хоналари ҳамда дам олиш жойларида намунали тозаликни ташкил этиш, ундаги жиҳозлардан тўғри ва унумли фойдаланиш;

газ, электр жиҳозларидан ҳамда иситиш тизимидан фойдаланиш қоидаларига қатъий риоя қилиш ва улардан оқилона фойдаланиш;

турар жойидан узоқ муддатга кетаётиб (ёзги ва қишки таътил, дам олиш, амалиёт, академик таътил олган ҳоллар), турар жойи раҳбарини икки кун олдин ёзма равишда огоҳлантириб қўйиш;

кундалик эҳтиёжга эга бўлмаган катта ҳажмдаги шахсий ва қимматбаҳо буюмларни турар жойининг буюмлар сақлаш хонасига топшириш;

яшаб турган хонаси ва бошқа умумий фойдаланиш жойларини ҳар доим тоза ва тартибли тутиш;

турар жойида яшовчилар билан доимо самимий, аҳил муносабатда бўлиш;

турар жойидаги мавжуд барча жиҳозларни намунали даражада тутиш;

умумий фойдаланиш жойларига ўрнатилган ёритгичлар, электр ва газ плиталарини бузмаслик, ювиниш хонаси, ошхона ҳамда маънавият ва маърифат хоналаридан тўғри фойдаланиш;

турар жойида ўтказиладиган ҳашарларда, теварак-атрофларни кўкаламзорлаштириш ва ободонлаштириш ишларида мунтазам равишда қатнашиш;

турар жойи мол-мулкидан тўғри ва унумли фойдаланиш ва зарар етказмаслик;

ўқишни тугатгач ёки талабалар сафидан четлаштирилган, академик таътил олган ҳолларда икки кун муддатда, шунингдек турар жойидан узоқ муддатга кетишдан олдин (ёзги ва қишки таътил, дам олиш, амалиёт) жиҳозларни ва хона калитини турар жойи раҳбарига қайтариб топшириш.

24. Турар жойида яшовчиларга қуйидагилар қатъиян ман этилади:

деразадан чиқинди ва бошқа нарсаларни ташлаш;

эшик кулфларини турар жойи раҳбари рухсатсиз алмаштириш;

яшаш хонасида кийимларни ювиш, энергия тармоқлари (ўтказгичлар)ни ўз хоҳишича ўзгартириш, уларга уланиш ва қўшимча ёритгич ўрнатиш;

яшаш хонасида оргтехника жиҳозлари, жумладан нусха кўчириш, рангли ва рангсиз принтер ҳамда турли нашриёт асбоб-ускуналарини ишлатиш (ноутбук, планшетлар бундан мустасно);

хона деворлари кўринишини ўзгартириш, овоз чиқарувчи қурилмалар овозини ва бошқа овозларни хона ташқарисидан эшитилишига йўл қўйиш ва мусиқа асбобларини чалиш;

хавфли ва ёнғин чиқариши мумкин бўлган моддалар, тегишли текширувдан ўтмаган ускуналардан фойдаланиш ёки сақлаш;

турар жойи раҳбари ёки навбатчи рухсатсиз бегона одамларнинг хонада бўлишига йўл қўйиш, хона калитларини бегона шахсларга бериш, ўзбошимчалик билан яшаш хоналарини ўзгартириш;

уй (ёввойи) ҳайвонларини сақлаш;

турар жойига тегишли компьютер, кабел тармоқларига ўзбошимчалик билан ёки тегишли рухсатсиз уланиш;

яшаш хонасида бошқа шахсларга ҳалақит берадиган йирик ашёларни сақлаш;

турар жойи ҳудудида маст ҳолатда бўлиш, спиртли ичимликлар, тамаки маҳсулотлари, гиёҳванд ҳамда психотроп моддалар сақлаш ёки истеъмол қилиш.

6-боб. Турар жойи раҳбарининг ҳуқуқ ва мажбуриятлари

25. Турар жойи раҳбари қуйидаги ҳуқуқларга эга:

Турар жойи ҳаётида фаол иштирок этаётган хулқи намунали талабаларни рағбатлантириш бўйича олий ва ўрта махсус, профессионал таълим муассасаси раҳбариятига таклиф киритиш;

яшовчиларни турар жойининг бир хонасидан бошқа хонасига кўчириш;

фавқулодда вазиятларда, хона калитлари ўз вақтида топширилмаган ҳолатларда хоналар кулфларини очиш;

турар жойида белгиланган тартиб ва қоидалар яшовчи томонидан бузилганида ёки мажбуриятлар бажарилмаганда ўрнатилган тартибда жазо чораларини кўриш бўйича олий ва ўрта махсус, профессионал таълим муассасаси раҳбариятига таклиф киритиш.

26. Турар жойи раҳбари:

белгиланган тартибда хона ва жиҳозларни ўз вақтида яшовчига фойдаланишга бериш;

яшовчиларнинг яшаш хоналари тоза ва озодалигини назорат қилиш ва яшаш шароитларини мунтазам равишда текшириб туриш;

турар жойида яшаш шароитларини яхшилаш ҳамда жорий ва капитал таъмирлаш бўйича чоралар кўриш;

яшовчига берилган жиҳозларнинг яроқлигини доимий назорат қилиш;

тарбиявий, маданий ҳамда спорт-соғломлаштириш тадбирларни ташкил этиш;

ёнгин хавфсизлиги ва жамоат тартиби сақланишини таъминлаш;

тўшак анжомларини ўз вақтида алмаштириш бўйича чоралар кўриш;

турар жойи ҳар бир хоналари санитария-гигиена ҳолатини, шу жумладан гигиена хоналари (ҳожатхона, ҳаммом, ошхона ва ҳ.к.)ни, мавжуд сантехника қурилмалари, иссиқлик, газ, электр таъминоти тизимлари ҳолатини талаб даражасида бўлишини таъминлаш;

турар жойи энергия таъминоти тизимидаги бузилишларни тезкор бартараф этиш чораларини кўриш;

коммунал хизматларда узилишлар рўй берганда ва бошқа авария ҳамда фавқулодда ҳолатларда тегишли тезкор чоралар кўриш, шунингдек олий ва ўрта махсус, профессионал таълим муассасаси раҳбариятини хабардор қилиш;

ҳуқуқбузарликларни олдини олиш, талабалар билан суҳбат ҳамда тегишли тушунтиришлар ўтказиш, заруратга кўра маслаҳатлар ташкил этиш;

турар жойига келувчиларни назорат қилиш;

мазкур Қоидаларига риоя қилинишини таъминлаш мажбуриятини олади.

27. Турар жойининг хавфсиз фаолияти учун шарт-шароитлар яратиш, талабалар хавфсизлигини узлуксиз равишда таъминлаш, ёшлар билан олиб борилаётган тарбиявий ишларнинг таъсирчанлигини ошириш, олий ва ўрта махсус, профессионал таълим муассасаси ходимлари ва талабалари ўртасида ўзаро мулоқот маданиятини ривожлантириш, барча яшовчилар томонидан Талабалар (ўқувчилар) турар жойи тўғрисида Низом, мазкур Қоидалар ва олий ва ўрта махсус, профессионал таълим муассасаси одоб-ахлоқ қоидалари ҳамда ички тартиб қоидаларига риоя қилишни таъминлаш учун турар жойи биноларида педагог ва бошқа ходимлардан иборат навбатчилик жорий қилинади. Навбатчиликни ўташ белгиланган тартибда амалга оширилади.

7-боб. Яқуний қоидалар

28. Мазкур Қоидаларни бузган яшовчиларга қуйидаги жавобгарлик чоралари қўлланилиши мумкин:

хайфсан эълон қилиш;

турар жойидан чиқариб юбориш;

талабалар сафидан четлаштириш.

29. Ушбу Қоидаларни бузган турар жойида яшовчиларга нисбатан қонун ҳужжатларида белгиланган бошқа жавобгарлик чоралар ҳам қўлланилиши мумкин.



Олий ва ўрта махсус, таълим вазирининг 2019 йил
даги 1019 -сон буйруғига
3-ИЛОВА

**Олий ва ўрта махсус, профессионал таълим муассасалари ходимларининг
Талабалар (ўқувчилар) турар жойида навбатчиликни
ўтказиш тўғрисида намунавий
НИЗОМ**

1-боб. Умумий қоидалар

1. Мазкур Низом Олий ва ўрта махсус, профессионал таълим муассасалари (кейинги ўринларда таълим муассасалари деб юритилади) Талабалар (ўқувчилар) турар жойи (кейинги ўринларда турар жой деб юритилади)да навбатчилик ўтказишни ташкил қилиш, навбатчининг ҳуқуқ ва мажбуриятларини тартибга солади.

2. Ушбу Низомда қуйидаги асосий тушунчалардан фойдаланилади:

навбатчи – навбатчилик жадвалига мувофиқ навбатчилик ўтовчи педагог ва бошқа ходим;

навбатчилик жадвали – навбатчиликни амалга ошириш юзасидан доимий назоратни таъминлаш мақсадида, ҳар ўқув йили учун таълим муассасаси раҳбари буйруғи билан тасдиқланадиган жадвал;

яшовчи – турар жойда яшаётган таълим муассасалари талабаси (ўқувчиси).

2-боб. Навбатчиликнинг мақсад ва вазифалари

3. Навбатчиликни ташкил қилишдан мақсад турар жойнинг хавфсиз фаолияти учун шарт-шароитлар яратиш, талабалар хавфсизлигини узлуксиз равишда таъминлаш, ёшлар билан олиб борилаётган тарбиявий ишларнинг таъсирчанлигини ошириш, таълим муассасалари ходимлари ва талабалари ўртасида ўзаро мулоқот маданиятини ривожлантириш, барча яшовчилар томонидан Талабалар (ўқувчилар) турар жойи тўғрисида низом, Талабалар (ўқувчилар) турар жойи ички тартиб қоидалари ва таълим муассасалари одоб-ахлоқ қоидаларига риоя қилишни таъминлаш.

4. Навбатчиликнинг вазифалари:

турар жойда тозалик ва тартибни, мол-мулк сақланишини;

турар жойда бегона шахслар ва шубҳали предметлар бўлмаслигини;

турар жой бинолари ва уларга туташ ҳудудларнинг санитар-гигиеник ҳолатини қониқарли даражада сақлаш, иссиқлик таъминоти, сув-оқава, электр, телефон алоқа тизимларининг нормал ва хавфсиз бўлишини;

фавқулодда вазиятлар юз берганда, тезкор ҳаракат қилиш ва тегишли чоралар кўришни таъминлаш.

3-боб. Навбатчиликни ташкил қилиш

5. Навбатчиликни ташкил қилиш ва унга раҳбарлик қилиш таълим муассасалари ёшлар билан ишлаш бўйича проректори (директор ўринбосари)га юклатилади.

6. Навбатчилик тўлиқ ўқув йили давомида ҳар куни, шу жумладан байрам ва дам олиш кунлари ташкил қилинади. Навбатчиликка таълим муассасаларининг асосий штатда ишловчи ходимлари жалб қилинади.

7. Навбатчилик жадвалига асосан, наватчилик ҳар куни 18.00 дан 08.00 гача ўтказилади. Дам олиш ва байрам кунлари наватчилик соат 08.00 дан бошлаб 24 соат давом этади.

Наватчиликнинг ўтиши юзасидан эътироз ва таклифлар наватчи хонасида сақланадиган наватчиликни қайд этиш журналига ёзиб борилади. турар жой мудирини ушбу наватчиликни қайд этиш журнали юритилишига масъул ҳисобланади.

Наватчиликни қайд этиш журнали мазкур низомнинг 1-иловасида келтирилган шаклга мувофиқ расмийлаштирилади.

8. Талабаларни турар жойига кириш Талабалар (ўқувчилар) турар жойи ички тартиб қоидаларига асосан, тегишли ҳужжат асосида амалга оширилади. Хавфсизликни таъминлаш мақсадида, бегона шахсларни турар жойига кириши таъқиқланиши мумкин.

Айрим ҳолларда турар жойига киришга рухсат берилган бегона шахсларни Ф.И.Ш., келиш мақсади, турар жойига кириш ва чиқиб кетиш вақтини наватчи белгиланган тартибда тегишли журналга қайд қилиши лозим.

9. Турар жойи раҳбари наватчилик жадвалига риоя қилиниши устидан назорат қилади ва наватчи бўлмаган ҳолларда Ёшлар билан ишлаш, маънавият ва маърифат бўлими бошлиғини хабардор қилади.

4-боб. Навбатчиларнинг ҳуқуқ ва мажбуриятлари

10. Навбатчи қуйидаги ҳуқуқларга эга:

наватчилик вақтида яшовчилардан Талабалар (ўқувчилар) турар жойи тўғрисида низом, Талабалар (ўқувчилар) турар жойи ички тартиб қоидалари ва таълим муассасалари одоб-ахлоқ қоидаларига риоя қилишни талаб қилиш;

яшовчи учун мажбурий кўрсатмалар бериш;

яшайдиган хоналарни санитария-гигиена талабларига, ички тартиб қоидаларга риоя қилинишини таъминлаш мақсадида кириб текшириш;

турар жойига кирувчи ёки кирган бегона шахслардан шахсини тасдиқловчи ҳужжатларни талаб қилиш;

наватчилик вақтида Талабалар (ўқувчилар) турар жойи тўғрисида низом, Талабалар (ўқувчилар) турар жойи ички тартиб қоидалари ва таълим муассасаси одоб-ахлоқ қоидаларини бузган, шу жумладан турар жойига белгиланган вақтдан кечикиб келган яшовчидан мавжуд ҳолатга аниқлик киритиш мақсадида, тушунтириш олиш ва тегишли чора кўриш бўйича таълим муассасаси ёшлар билан ишлаш бўйича проректори (директор ўринбосари)га таклиф киритиш;

наватчилик вақтида аниқланган камчиликлар ва юзага келган ҳолатларни олдини олиш мақсадида, таълим муассасаси раҳбариятига таклифлар киритиш.

11. Навбатчи қуйидаги мажбуриятларни бажаради:

наватчиликни ўташга қатъий равишда ўз вақтида киришиш ва наватчиликни тўлиқ ўталмай қолишига йўл қўймаслик;

наватчиликка киришганлиги ҳақида Ёшлар билан ишлаш, маънавият ва

маърифат бўлими бошлиғи ҳамда тегишли ташкилотларни хабардор қилиш ва сўралган маълумотларни етказиш;

навбатчилик вақтида таълим муассасалари ёшлар билан ишлаш маънавий-маърифий ишлар бўйича проректори рухсатсиз навбатчиликни ташлаб кетмаслик;

навбатчилик бошланишидан олдин ва якуни юзасидан навбатчиликни қайд этиш журналини шахсан тўлдириш, белгиланган телефон рақамлар орқали тегишли маълумотларни етказиш, фавқулодда ҳолатларда зарур бўладиган телефон рақамлари рўйхати мавжудлиги, ёнғин хавфсизлиги воситалари, сигнализатсиялар, турар жойда олиб борилаётган видеокузатув мосламалари, эшик қулфлари ва бошқаларни созлигини текшириш, камчиликлар аниқланган ҳолларда турар жой раҳбарини хабардор қилиш ва тегишли журналда қайд этиш;

турар жойда тозалikka, Талабалар (ўқувчилар) турар жойи ички тартиб қоидалари ва таълим муассасаси одоб-ахлоқ қоидаларига риоя қилинишини қатъий назорат қилиш, талабалар билан тушунтириш, тарбиявий ишларни амалга ошириш;

навбатчилик бошланишида ва тугаш вақтида турар жой ҳудудини текшириш;

газета ва журналларнинг сўнгги сонлари билан таъминланганлигини, уларнинг сақланишини назорат қилиш;

ҳар бир хонанинг санитария-гигиена ҳолатини, шу жумладан гигиена хонаси (ҳожатхона, ҳаммом, ошхона ва ҳ.к.)ни текшириш;

турар жойдаги мавжуд сантехника қурилмалари, иссиқлик, газ, электр таъминоти тизимлари ҳолатини аниқлаш мақсадида, турар жой қаватларини текшириш ва улардан оқилона фойдаланишни назорат қилиш;

яшаш хоналарида яшовчилар борлигини қоида тариқасида шахсан текшириш (йўқлама қилиш) ва тегишли журналга қайд этиш, улар Талабалар (ўқувчилар) турар жойи тўғрисида низом, Талабалар (ўқувчилар) турар жойи ички тартиб қоидалари ва таълим муассасаси одоб-ахлоқ қоидаларига риоя қилишларини, узрли сабабларсиз турар жойда бўлмаган яшовчи аниқланган ҳолларда турар жой раҳбарини хабардор қилиш;

турар жой қаватларида тартиб-қоидаларга риоя қилинишини таъминлаш;

ҳуқуқбузарликларни олдини олиш, талабалар билан суҳбат ҳамда тегишли тушунтиришлар ўтказиш, заруратга кўра маслаҳатлар ташкил этиш;

талабалар мустақил таълим олишларини текшириш ва зарур ҳолларда ёрдам кўрсатиш;

Талабалар (ўқувчилар) турар жойи ички тартиб қоидаларига риоя қилинишини таъминлаш;

турар жойга келувчиларни назорат қилиш;

турар жойга бегона шахсларни рухсатсиз киришига йўл қўймаслик, ушбу шахслар аниқланган ҳолатда уларни турар жойдан чиқиб кетиши учун зарур чораларни кўриш;

фавқулодда ҳолатларда тегишли тезкор чоралар кўриш;

коммунал хизматларда узилишлар рўй берганда ва бошқа авария ҳолатларида турар жой раҳбари ва таълим муассасаси раҳбариятини хабардор

қилиш;

эвакуатсия режаси, ёнгин хавфсизлиги воситалари ва сигнализатсиялар жойлашган жойни билиш ва улардан фойдалана олиш;

навбатчилик вақтида содир бўлган низоли ҳолатларни бартараф этиш;

навбатчилик вақтида аниқланган камчиликлар, шу жумладан маиший-хўжалик соҳасидаги носозликлар, яъни иссиқ ва совуқ сув, ёритгичлар билан таъминлаш, умумий фойдаланиш жойлари талабга жавоб бермаслиги, шунингдек тартиббузарликлар ҳақида навбатчиликни қайд этиш журналига ёзиш ва тегишли шахсларга хабар бериш;

бегона шахслар томонидан ножўя ҳаракатлар, ҳуқуқбузарлик ҳаракатлари содир этилган ҳолларда, турар жой раҳбари ва таълим муассасаси раҳбариятини хабардор қилиш ҳамда ҳуқуқни муҳофаза қилувчи органларга хабар бериш;

турар жойда яшаётган талабалар (ўқувчилар)ни йўқлама қилиш журнали мазур низомнинг 2-иловасида келтирилган шаклга мувофиқ расмийлаштирилади.

12. Навбатчилик давомида навбатчининг кўрсатмалари яшовчилар учун мажбурий ҳисобланади.

13. Навбатчи турар жойда белгиланган вақтда ташқи эшиклар қулфланишини таъминлайди ва яшовчиларни ўз жойларида бор ёки йўқлиги ҳақида, шунингдек турар жойга бегона шахслар келган ёки келмаганлиги ҳақида Ёшлар билан ишлаш, маънавият ва маърифат бўлими бошлиғига маълумот беради.

Навбатчи навбатчилик вақтида навбатчилик хонасидаги мол-мулк, ёнгин хавфсизлиги воситалари, телефон, ёруғлик ва ҳужжатлар сақланиши учун жавобгар шахс ҳисобланади.

14. Турар жойи раҳбари навбатчига навбатчилик вақтида белгиланган тартиб-қоидаларга риоя қилинишини таъминлашга ҳар томонлама кўмаклашади.

5-боб. Яқуний қоидалар

15. Мазкур низомга, навбатчилик жадвалига риоя қилмаслик, навбатчилик ўташни рад этиш — навбатчилик ўташга нисбатан масъулиятсизлик билан ёндашиш ҳисобланади ва таълим муассасаси ички тартиб қоидаларига мувофиқ интизомий жавобгарлик чорасини қўллашга асос бўлади. Ушбу ҳолат моддий зарар етишига сабаб бўлса, у ҳолда ходим белгиланган тартибда моддий жавобгарликка ҳам тортилади.

16. Навбатчи ўз фаолияти давомида содир этилган ҳуқуқбузарликлар учун фуқаролик, маъмурий, жиноий жавобгарлик тўғрисидаги қонун ҳужжатларига мувофиқ ҳам жавобгар ҳисобланади.



Олий ва ўрта махсус, профессионал таълим
муассасалари ходимларининг Талабалар турар жойида
навбатчиликни ўтказиш тўғрисида низомга
3.1-ИЛОВА

ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС ВАЗИРЛИГИ

(олий ва ўрта махсус, профессионал таълим муассасаси номи)

ТАЛАБАЛАР (ЎҚУВЧИЛАР) ТУРАР ЖОЙИ
_____ — сон

ТАЛАБАЛАР (ЎҚУВЧИЛАР) ТУРАР ЖОЙИДА
ХОДИМЛАРНИНГ НАВБАТЧИЛИГИНИ
ҚАЙД ЭТИШ

Ж У Р Н А Л И

ТОШКЕНТ — _____

**Олий ва ўрта махсус, профессионал таълим муассасалари
Талабалар (ўқувчилар) турар жойида ходимларнинг
навбатчилигини қайд этиш журналини юритиш
ТАРТИБИ**

1. Мазкур журнал навбатчи томонидан навбатчилик ўтишини қайд этиш ҳужжати ҳисобланади.
2. Журналга навбатчининг лавозими, фамилияси, исми, отасининг исми ёзилиб, навбатчилик бошланган сана ва вақти кўрсатилган ҳолда унинг имзоси билан тасдиқланади.
3. Навбатчи навбатчилик бошланишидан олдин навбатчилик хонасида мавжуд бўлган телефонлар орқали олий ва ўрта махсус профессионал таълим муассасалари Ёшлар билан ишлаш, маънавият ва маърифат бўлими бошлиғига, тегишли ташкилотларга навбатчиликка киришганлиги тўғрисида хабар беради ва керак бўлган маълумотларни етказди. Ушбу ҳолат журналга тегишлича қайси ташкилотга, қачон ва қайси телефон рақами орқали ҳамда етказилган маълумот мазмунини кўрсатган ҳолда қайд қилинади.
4. Навбатчиликни ўташ вақтида навбатчи Талабалар (ўқувчилар) турар жойи (кейинги ўринларда турар жойи деб юритилади) ҳудудини текшириши ва ўрганиш натижасини баён қилиши, мавжуд қоидаларга турар жойида яшовчилар томонидан риоя қилиниш ҳолати, хусусан Талабалар (ўқувчилар) турар жойи тўғрисида низом, Талабалар (ўқувчилар) турар жойи ички тартиб қоидалари ҳамда одоб-ахлоқ қоидаларига риоя қилиниши кўрсатилади. Муайян қоидабузарликлар аниқланган, шу жумладан турар жойида олиб борилаётган видеокузатув мосламаларида акс эттирилган ҳолларда тегишлича журналга қайд қилинади.
5. Навбатчилик ўташ вақтида навбатчи турар жойида паспорт режимига риоя қилинишини назорат қилади. Ташқаридан бегона шахслар келган ҳолларда уларнинг ҳужжати ва келишдан мақсадини аниқлайди. Талаба ёки тингловчи томонидан турар жойига кириш-чиқиш тартиби бузилган ҳолларда навбатчи улардан тушунтириш хати олади ва бу ҳақда журналга ёзилади.
6. Барча қаватларда талабалар учун яратилган шароитларни ўрганган ҳолда навбатчи уларнинг талаб даражасида эканлиги ёки камчиликлар мавжудлигини аниқлайди. Навбатчи ходим турар жойининг яшаш хоналари, дам олиш жойларидан тўғри фойдаланишни, тозалик ва тартибни ташкил этишни, улардаги жиҳозлардан тўғри ва унумли фойдаланишни қоида тариқасида шахсан ҳар бир хонага кириб, текшириб чиқади ва унинг

натижасини тегишлича журналга киритади.

7. Навбатчиликни ўташ вақтида умумий фойдаланиш жойлари, хусусан ошхона, ювиниш хонаси, ҳожатхоналар, шунингдек улардаги жиҳозлар бутлиги, тоза ва озодалиги, санитария-гигиена, шу жумладан сантехника қурилмалари, иссиқлик, газ, электр таъминоти тизимлари ҳолати текширилиши лозим.

8. Навбатчилик вақтида турар жойида мавжуд ёнғин хавфсизлиги воситалари ва сигнализатсиялар ҳолати, турар жойида олиб борилаётган видеокузатув мосламалари созлиги, биринчи ёрдам кўрсатиш имконияти яратилганлиги ўрганилиб, мавжуд ҳолат журналда акс эттирилади.

9. Навбатчи ходим турар жойида газета-журналларнинг сўнгги сонлари билан таъминланганлик ҳолати, хусусан қайси газета ва охириги сони мавжудлигини, талабалар билан ўтказилган суҳбат, тушунтириш олиб борилганлигини қайд этади. Бунда тарбиявий ишларнинг мавзуси, қават ва хона акс эттирилади ҳамда ушбу ишлар олиб борилган талабалар имзоси билан қайд қилинади.

10. Навбатчи ходим навабатчилик ўташ вақтида аниқланган камчиликлар ва юзага келган ҳолатларни баён қилиб, ўзининг таклифларини билдиради.

11. Навбатчиликни қайд қилиш журналига навабатчи ходим тегишли қайдлар киритилгандан сўнг, навабатчилик тугаган сана ва вақти аниқ кўрсатилиб, унинг имзоси қўйилади. Навбатчилик тугаганлиги ҳақидаги қайд фақат навабатчилик тугагандан сўнг киритилади.